

---

**■ PUNTG DA VISTA**


---

## Cumpromiss pratic u manever marsch?

DA CLAUDIA CADRUVI / ANR

---

**I**l glindesdi saira è sa derasada la nova: La pps e la pld tanschan maun per in cumpromiss pertugant abitaziuns secundaras. Sch'il parlament taissa quest cumpromiss en la lescha èn las vistas bunas che las regiuns turisticas pon prest puspè planisar l'avegnir senza intschertezzas. L'alternativa fiss in cumbat bunamain sempitern che finess cun in referendum cunter la lescha d'abitaziuns secundaras e forsa cun in naufragi a l'urna.

**I**l cumpromiss stumpla trais craps da stgarpitsch maltschecs ord la lescha. Sco emprim: Novas abitaziuns da vacanzas che vegnan scrittas ora sin plattafurmas na vegnan betg lubidas. Sco segund: Hotels vegls e nunrentabels dastgan vegnir midads mo per 50 pertschient en abitaziuns secundaras. Sco terz: Bajetgs vegls, sut il chavazzin dubius «erhaltenswerte Bauten», na dastgan betg simplamain vegnir midads en abitaziuns da vacanzas.

**I**ntgins paucs exponents da la pps e pld han handlegià ora quest cumpromiss cun Vera Weber sco represchentanta dals iniziants. Quai è capità en l'ultim mument avant la debatta en il cussegl naziunal. Igl è chapaivel che las autras partidas han reagì ier l'emprim cun disfidanza. En sasez duessan las schliaziuns gea vegnir discutadas en las cumissiuns e betg insanua davosaura en «gremis» casuals.

**A**la pps han ins renfatschà ier en la debatta d'entrada «manevers marschs». La partida fetschia mo finta da tanscher maun perquei ch'ella na fissia uschiglio betg credibla sch'ella pretendia da metter enturn a moda strica l'iniziativa d'immigraziun. Questas renfatschas, cunzunt da la pcd e da la ps, han gì in tif permalà, damai ch'ins n'è betg stà involvì en las contractivas cun Vera Weber.

**P**er cletg n'ha il cussegl naziunal betg laschà reger sias decisiuns da tals resentiments. Ils impurtants puncts dal cumpromiss ha la chombra gronda approvà ed oz vegnan discutads ils ultims artitgels. Gia l'emna proxima sa fatschenta la chombra pitschna puspè cun la fatschenta e discute-scha las differenzas. En la chombra pitschna èn dentant quels pli fermes che vulan laschar bajegiar dapli abitaziuns da vacanzas. Il cumpromiss è pia sin buna via, ma anc ditg betg sut tetg.